

DE
PRINCIPALI CAUSA
DISSENSIONVM INTER
LAEONEM ET CAPITONEM
HORVMQVE SECTATORES.

ILLVST. I. CTORVM COLLEGI AVCTORIT
PRAESIDE
CAROLO FERDINANDO HOMMELIO

IVR. VTRQ. DOCT

D. XVI. IVLII ANNO MDCCL

DISPV TABIT

G V I L I E L M V S R e d

LIPSIENSIS

L. V. STVD

L I P S I A E

EX OFFICINA LANGENHEMIANA



V I R O
MAGNIFICO ET EXCELLENTISSIMO
D O M I N O
FERDINANDO AVGVSTO
H O M M E L I O

I. V. D. INSTIT. PROF. PVBL. ORD. ET FAC. IVRID. ASSESSORI
MERITISSIMO

P A T R O N O O P T I M O

D. D.

CLIEVS ADDICTISSIMVS
G V I L I E L M V S R e c t .



*aud perperam me facturum arbitratus sum, si in
mentis meae erga TE deditissimae testificationem
hoc tenui quodam documento obfignarem. Dul-
cissima enim animum meum subit recordatio, me studiorum
meorum incrementa sub TVIS auspiciis magno meo solatio
posuisse,*

posuisse, cuius rei imago tam alte apud me radices egit, ut summo cum gaudio semper aevi illius memoriam mihi renouem. Verum enim vero si huius meae felicitatis causam exactius perpendo, modica illa incrementa modicasque accessiones TIBI, VIR EXCELLENTISSIME, acceptas debeo; cui ergo conuenientius quam TIBI ipsi hanc studiorum meorum coronidem offerrem atque consecrarem? Multum Hommeliano nomini semper tribui, et hinc FILIVM Praesidem, PATREM Patronum elegi. Non dubito autem fore, ut praesentem deuotae religionis meae tesseram TIBI submisisse oblatam, serena, uti semper soles, fronte accipias; ex his enim argumentum propensi TVI fauoris et summi patrocinii mihi capere liceat. Quod superest, nullam intermittam occasionem, Deum Ter Optimum Maximum ardentissimis defatigandi precibus, quo TE, PATRONE SVBMISSE VENERANDE, saluum ac sospitem omnique felicitate conseruet, quo familia IVA splendidissima, quae in TE Optimum decus et praesidium firmissimum concessit, suum in omnem aetatem teneat splendorem. Tuo autem in posterum fauore atque praesidio frui, benigne ac gratiose, quod vnice rogo, mihi clienti TVO concede.



§. I.



Duas inter se maxime discrepantes, quae a LABEONE *Huius dispu-*
et CAPITONE profluxerunt, deinde a PROCV- *tationis pro-*
LO et SABINO auctae sunt, iurisconsultorum *positum.*
familias fuisse, a multis saepe dictum et copiose
fuit; quale autem caput et princeps huius dissidii
causa sit, tam est intricata atque incerta quaestio, ut fere, quot de
ea re scripserint, tot diuersae habeantur doctorum virorum senten-
tiae. Nobis vero, qui eundem campum ingredimur, in quo et alii
satis iactati sunt, non ex Digestorum amplissimo opere, neque illis
quingenta decisionibus, quibus iurisconsultorum hoc civile bel-
lum ipse IVSTINIANVS composuit, ea colligere animus est, quae
Proculiani et Sabiniani diuersa senserunt, (is enim anteriorum labor
fuit) sed potius in illam supremam omnium et generalem causam
inquiremus, quae deinde, in singulis quaestionibus, diuersas respon-
siones et illa dissidia peperit. Neque enim haec dissonantia inter se
scholae utriusque decreta annotasse, satis est, sed rationes praeterea
causasque perquirere decet, quibus illi, ad talem in definiendo res-
pondendoque diuersitatem adduci potuerunt. Vna est videlicet,
quae in duas partes dissipauit iurisconsultorum familiam, sed capita-
lis quaedam aberratio et diuersa intelligentia rerum, ex qua, in sin-
gulis iuris articulis, deinde reliquae diuersitates, tamquam a scaru-
rigine

rigine sua, omnes emanauerunt. Videmus autem in omnibus artibus et disciplinis ita fieri, vt vel vnica informatio falsâ, vbi semel nidulata est et impressa in animis hominum, aberrationes ex se innumerabiles gignat, et diducere mortales soleat

Ramosa in compita mentes.

Quaeremus itaque finem vltimum atque decretum illud omnium supremum, ad quod particulares, in causis singulis, dissensiones collineant. De Gellio quodam familiari suo, narrat *in primo de legibus libro, capite vigesimo*, ille, Romanae eloquentiae pater et caput, CICERO: eum, cum pro consule ex praetura Asiae in Graeciam venisset, conuocasse Athenis philosophos, et quaesivisse, quatenus causa sit, quamobrem in nulla fere re consentiant? simulque pollicitum esse suam operam, si transigere inter se et conuenire velint. Possê autem, dixit, controuersias eorum facile finire, si eo essent animo, vt in primis sententis velint conuenire. Hoc proconsulis consilium, hominis scilicet in iure occupati, qui philosophorum dissensiones vt lites ciuium pecuniarias componi posse arbitrabatur, quamquam ioculare et pene ridiculum videri possit, mihi tamen, nescio quomodo, cogitationem iniecit generosam illam quidem, sed temerariam quodammodo, excutiendi iurisconsultorum opiniones singulas, et decretum illud perquirendi summum, ex quo diuersae vtriusque sectae opiniones propullularint. Sane, si HESIODVS potuit, deorum in coelo habitantium generationem carminibus pandere, eosque ex chao omnes educere, cur mihi sententiarum non liceat quamdam quasi generationem successumque describere, et dissensiones omnes ab vna et principali informatione, tamquam e chao, educere? Ita enim statuimus, ab vno falso decreto innumerabiles errores profluere, nec in disciplinis solum, verum etiam in ipsis religionibus, ideam euenire. Nos enim, qui diuinam illam Lutheri doctrinam approbamus, scriptum potius intuenur; illi autem, qui Caluini, rationem. Haec prima et capitalis diuersitas, quam ipsam arbitror fusius explicasse NICOLAVM HVNNIVM *de fundamentali dissensu Lutheranorum et Caluinianorum*, cuius tamen librum, quamquam studiose in bibliothecis quaesierim, videre non potui. Sic vna plerumque est maximarum haeresium causa, et perpauca habentur dissidiorum principia, quae, aucta suis progressionibus, facili cursu deinde propagantur seque diffundunt et dilabuntur latius, vt Iani illud apud OVIDIVM omnino verum putem, qui

Principiis cuncta, inquit, inesse solent.

Est

Est autem haec dissensionum ac sententiarum generatio explicatu difficillimâ, et perquam arduum, clare dilucideque demonstrare, quomodo singula sectae vtriusque effata ab vno quodam principali emanauerint dogmate, propterea quod non raro postremae conclusiones a principiis suis specie ita sunt differentes, vt ille doctrinae nexus, sine solertia summa, vix indagari possit. Vt enim frutex, qui e semine natus est, maximam dissimilitudinem habere solet cum isto, ita in disciplinis postremas conclusiones saepe videas discrepare ab iis plurimum, ex quibus profuxere;

*Est genus omne auium mediis e partibus omi,
Ni sciret fieri, quis nasci posse putaret?*

• OVID.

§. II.

Sed antequam orientem illam a communi tamquam stipite sententiarum quasi successione describimus, operae pretium est, vt, quacausam dissensionum ab
nam de causis sectarum alii senserint, breui oratione declaremus. *acumulatione repetit BOE-*
Cum enim, qui de familiis iurisconsultorum commentarios scripserunt, summi viri, Labeonem cum Capitone, et Proculianos cum Sabinianis nulla propemodum in re conuenire animaduertent, quidam harum altercationum rationem perferunt, ab aemulatione, quidam vero a morum atque ingenii diuersitate, rursus alii a studio nouitatis in vno antiquitatisque in altero, et denique a diuerso philosophiae genere, causam repetiere. Primus, qui in Germania *de diuersis iurisconsultorum familiis tractatum* edidit, CHRISTIANVS OTTO A BOECKELEN capite primo huius tractationis in fine: *Dubium non est, inquit, quin ex sola aemulatione, aut prout quisque vel in acquitatem, vel in strictiorem iuris rationem promanarint.* Sane magna semper inimicitiarum ac dissensionum, imo bellorum causa aemulorum inuidia; nam vt LVCRETIVS canit:

*Miserat inuidia, ante oculos illum esse potentem,
Illum adspectari, claro qui incedit honore.*

Ipsi se in tenebris volui coenoque queruntur.

Plane illud singulare est, quod in voce *Amita*, de aemulatione FESTVS annotat, plus scilicet sorores a fratribus, quam fratres ipsos a fratribus diligi, *propter dissimilitudinem personarum quae ideo minus habeant DISSENSIONIS, quo minus AEMVLATIONIS.* Quomodo autem haec, quae de aemulatione diximus, ad Labeonem et Capitonem, qui duo primum veluti diuersas sectas fecerunt, ac-

commo-

commodari possunt? Dicamus statim, et quidem TACITI verbis, qui in libro III. *Annalium*, capite LXXV. ita refert: *Illa aetas duo decora simul pacis tulit. Sed Laheo incorrupta libertate, et ob id fama celebratior. Capitonis obsequium dominantibus magis probabatur. Illi, quod praeturam intra steterit, commendatio ex iniuria; huic, quod consulatum adeptus est, odium ex invidia oriebatur. Verum non inter ciuiles solum et iuris peritos homines, sed sacerdotes etiam aemulationem ambitionemque causas dissidiorum existisse, LACTANTIUS libro IV. Institutionum capite XXX. his verbis declarat: Fuerunt quidam nostrorum vel minus stabilita fide vel minus docti, vel minus cauti, qui discidium facerent veritatis et ecclesiam dissiparent. Scilicet, quorum fides fuit lubrica, quum Deum nosse se et colere simularent, augendis opibus et honori studentes affectabant maximum sacerdotium, et a potioribus victi, secedere cum suffragatoribus suis maluerunt, quam eos ferre praepositos, quibus concupierant ipsi praeponi. Verissima hic quidem narrat. Nam plane SOCRATES in historia ecclesiastica libro VI. capite XI. Iohannis Chrysostomi cum Seueriano dissensum ab inuidia ortum fuisse tradit; quae fortasse et similia quaedam exempla IOHANNI GVILIELMO BEYERO occasionem praebuere, quandam, de ambitione haeresum causa, dissertationem conscribendi.*

§. III.

MERILLIVS
a philosophiae
diuersa ra-
tione.

Sequitur EMVNDVS MERILLIVS, qui in libro primo Observationum aliisque locis Proculianos Stoicorum, Sabinianos vero Epicuri et Academicorum placita magis secutos esse, demonstrat, quae philosophandi diuersa ratio itidem in theologia multis et capitalibus sectas peperisse traditur. Illud enim TERTVLLIANI decretum, quod aduersus Hermog. capite VIII. et in libro de anima, capite III. protulit, satis superque tritum est: *Haeticorum patriarchas esse philosophos. Quid mirum ergo si philosophia, seditiosa illa morum et veritatis ministra, quae toties subuertit ecclesiam, in nostris iuriconsultorum beatis placidisque coetibus eosdem fere tumultus excitauit? Non improbabilis ideo MERILLII ratio, qui philosophiam dissidiorum causam perhibet, cui IANVS VINCENTIVS GRAVINA subscribit, quando in libro primo Originum Iuris ciuilis, capite XLV. ita commentatur: Nec parum auxit haec dissidia Stoicorum philosophandi genus, cui sese Proculiani magis obstrinxerant. Quomobrem illi multas iuris controuersias eius scholae seueritate desinuerunt, cum Iulianus, qui ex altera familia erat, subtilita-*

tes

tes illas iuris atque nimiam scrupulositatem intrepide contemserint. Consuetudine igitur Stoicorum Proculiani maxime occupabantur, in dialecticis, quorum Labeo peritissimus habebatur, plurimumque laborabant in regulis coniunctionum et disiunctionum perexendis ordinandisque verborum nexibus. Igitur illi doctrina imbuti Stoicorum ex eorumdem sententia saepe pronuntiabant. In eadem opinione cum et nos essemus, tandem ab hac parte, nec inuitos, illustris atque doctissimi viri, GOTO FREDI. MASCOVII solers et adcurata nos demonstratio abduxit, qui quidem in pulcherrima sua, de *seclis Subinianorum et Proculianorum diatriba, in sexto capite*: vtriusque sectae iurisconsultos philosophia Stoica imbutos fuisse, adeoque diuersum sapientiae genus dissentendi nullam praebere causam potuisse, clarissime ostendit.

§. IV.

Admonet vero iam iniecta a nobis praestantissimi viri, grata MASCOVIVS
semper illa et iucunda nobis, MASCOVII memoria, vt huius a studio anti-
quoque sententiam lectoribus impertiamur. Non possumus au- quitatis et
tem illam tradere commodius aut elegantius, quam si ipsius nouitatis.
verbis, quae, in oratione de modestia veterum iurisconsulto-
rum p. 24. literis consignauit, proponamus. *Capito*, inquit, *etsi*
nouae dominationis auram callide assentando captare didicisset, in re-
gulis tamen artis, per manus ipsi traditis perstitit; Labeo autem,
quamquam nihil in republica ratum fixumque haberet, nisi quod in Ro-
manis antiquitatibus legisset, in iure tamen noua quotidie commi-
nifcebatur. Haec res magnam quidem habet atque egregiam spe-
ciem ob POMPONII locum, qui l. 2. §. 47. I. ff. de orig. iur. ita
luculenter tradit: *Hi duo primum veluti diuersas sectas fecerunt; Nam*
Atteius Capito in his, quae ei tradita fuerant, perseuerabat; Labeo
ingenii qualitate et fiducia doctrinae, qui et ceteris operis sapientiae
operam dederat, plurima innouare instituit. Nec parum eidem opi-
tatur Callii illa, apud TACITVM libro XIV. *annalium cap. XLIII.*
oratio, qui in senatu: *Saepe numero, dixit, Patres conscripti, in*
hoc ordine interfui, cum contra instituta et leges maiorum, noua se-
natu decreta postularentur, neque sum aduersatus, non quia dubita-
rem super omnibus negotiis melius atque rectius olim prouisum, et,
quae connerterentur, in deterius mutari, sed ne nimio amore antiqui
moris studium meum extollere viderer. Fuit autem hic CASSIVS
Capitonis primarius sectator, qui, cum diserte hoc studium suum di-
cat, in pristinis perseuerare, Mascouianae huius non leue momen-
tum sententiae addit. At subtili trutina fidam hanc a Tacito ora-
tionem

tionem ponderantibus, probabilius videtur, his verbis, non illud proprium Capitoneae sectae, sed iurisconsultorum commune, antiquitatis studium notari. Nam vetusta extollere et maiorum vestigiis instare, id peculiare iurisperitis ac proprium omnibus, quemadmodum ipse CICERO, in epistola XVII. libri septimi ad diuersos, indigitat, Trebatio iurisconsulto hac ratione rescribens: *Hoc quemadmodum VOS scribere soletis in vestris libris, idem Q. Cornelio videbatur*, et ipse ULPIANVS l. 2. ff. de const. princip. indicat, qui generatim edicit: *In rebus nouis constituendis euidentis esse utilitas debet, ut recedatur ab eo iure, quod diu aequum visum est.* POMPONIVS autem, qui Capitonem magis in traditis a maioribus perstitisse, Labeonem contra, suppeditante vbertatem ingenio, et ob studiorum fertilitatem, quaedam innouasse commemorat, dubito, an his verbis ipsum caput et dissensionum omnium summam indicare voluerit? Tantum enim hoc tamquam singulare obiter annotat, neque videtur, si rem omnino consideremus, capitalem dissidiorum causam, sed tantum partem aliquam diuersitatis attigisse, ut hoc pristini moris ac vetustatis studium non tam principalis videri debeat, quam accessoria potius et fortuita quaedam inter vtrosque diuersitas.

Sed videamus, an omnino illud, et quomodo verum sit? quod POMPONIVS scribit: *Atteius Capito in his, quae ei tradita fuerant, perseuerabat, Labeo plurima innouare instituit.* Sane, etiam si multa Labeonem commentum esse, facile largiamur, cum huius rei in libris nostris quam plurima exempla habeamus, quibus eum inuentis optimis ciuilem sapientiam locupletasse, probari possit, qualia sunt in lege 4. §. 3. XII. ff. de condiç. ob turp. caus. *Quod meretrici datur, repeti non potest, ut LABEO scribit, SED NON VA RATIONE.* et in lege 64. §. 9. XXIV. ff. solut. matr. *De viro heredeque eius lex tantum loquitur, de focero successoribus nihil in lege scriptum est, et hoc LABEO quasi omissum adnotat;* sunt tamen alia testimonia veterum scriptorum, quibus displicuisse potius Labeoni nouitatem vinci possit, quam placuisse. Sic vetus INTERPRES HORATII ad versum illum: *Labeone infanior: Marcus, ait, Antistius Labeo, iurisperitus memoratae libertatis, multa libere contra Caesarem dixisse et fecisse dicitur, ab eo latas leges contumaciter reprehendens.* Ac adeo quidem vetusti moris religiosus fuit, ut memorabili quadam pertinacia, cum a tribunis plebis vocaretur, prehendi maluerit, quam vocatus adparere, eam ob causam, quod moribus maiorum tribuni plebis vocationem non habebant. Haec GELLIUS XIII. 12.

ex epistola quadam CAPITONIS aduersarii eius retulit; *Agitabao* hominem libertas quaedam nimia, atque vecors usque adeo, ut diuo Augusto iam principe et rem publicam obtinente, ratum tamen pensumque nihil haberet, nisi quod iustum sanctumque esse in Romanis antiquitatibus legisset. Quum a muliere quadam tribuni plebis aduersum eum aditi, Gellianum ad eum misissent, ut veniret et mulieri responderet: iussit eum, qui missus erat, redire et tribunis dicere: ius eos non habere neque se, neque alium quemquam vocandi, quoniam maioribus maiorum tribuni plebis praefensionem haberent, vocationem non haberent. Posse igitur eos venire et prendi se iubere, sed vocandi absentem, ius non habere. Praeterea, id quod diximus, nempe Labeonem potius, quam Capitonem perseuerasse in maiorum vestigiis, ipse IVSTINIANVS, in titulo Institutionum de Codicillis, significat, in quo scriptum est: *Ante Augusti tempora constat codicillorum ius in vsu non fuisse. Dicitur autem Augustus conuocasse sapientes viros et quaesisse: an posset recipi hoc, nec absouans a iuris ratione codicillorum vsus esset? et Trebatium suasse Augusto, quod diceret utilissimum et necessarium ciuibus esse. Post quae tempora, cum et LABEO codicillos fecisset, iam nemini dubium, quin codicilli iure optimo admitterentur.* Dicit Iustinianus, codicilli an recipi possent, nec ne? dubitationem diu maximam habuisse; insecuto tamen tempore, cum antiqui moris ille studiosissimus Labeo, qui fere numquam a maiorum institutis recederet, innouanda haec putasset, placidiores omnes statim insecutos fuisse. Itaque tam veteratorem, quam nouatorem Labeonem diuersa ratione dicemus, et de eo potius praedicabimus, quod de eius aduersario Pomponius retulit. Licet enim praecellens Antistii ingenium ei plurima suppedicaret, tamen fuerunt eius inuenta eiusmodi omnia, ut cum veterum regulis optime conspirarent. Ac in hoc ipso, quod quaedam salutaria excogitauit, secutus est veteres. Nonne enim, qui ante eum fuerunt, formulas, acceptilationes et solemnitates quam plurimas, defractionem furculi in usurpationibus, lapilli iactum in nuntiatione operis, mulierum coemptiones, excogitarunt, atque fiducias varias? Ipse CATO, cuius duri mores et adstrictior iuris disciplina plus, quam illa Labeonis seueritas, concelebrata est, regulam plane nouam, sed subtilem et elegantem, quae ab inuentore Catoniana dicitur, reperiit. Haec, quamquam noua et a Catone demum inuenta sit, regula, per quam ea scilicet, quae initio vitiosa sunt, tempore non conualescunt, ipsa tamen ita est comparata, ut vetus magis confirmata sit per eam, quam subuerfa iuris disciplina. Similiter LABEO noster quaedam

excogitauit noua, quibus tamen, vt exemplis demonstrari potest, potius veterum sustinere, quam conuellere studeret disciplinam. Multum ille quidem, neque tamen tam absurde antiqua venerabatur, quin nouis etiam visis libenter assensum accommodaret, si a ratione iuris ea non discrepare intelligeret. Erant igitur, quae ipse inducebat, noua quidem, sed artis plena et veterum regulis plane idonea.

Hanc antiqui moris reuerentiam cum Labeoni potius commodauerimus, et iure quidem, quoniam ille, vt scribit GELLIVS, nihil ratum, pensumque habebat, nisi quod iustum sanctumque esse, in Romanis antiquitatibus legisset; quomodo ergo POMPONII verba intelligere debemus, qui non Labeonem, sed Capitonem asserit in his perseuerasse, quae ei per manus tradita essent? Aut penitus fallor, aut his ipsis significatur, Labeonem ingenio, Capitonem autem memoria praecelluisse. Capito enim cum memoria saltem maiorum instituta teneret, artis autem rationem non intelligeret, aut negligeret saltem, idcirco inuenire nihil, sed in veteribus haerere placitis maluit, licet illorum non posset vllam reddere rationem. Nam IULIANI, cui per Sabinum, Cassium et caeteros suae doctrinae alumnos vltimo lampadem, vt in proverbio est, Capito tradidit, IULIANI inquam illud est: *Non omnium quae a maioribus constituta sunt, ratio reddi potest.* Itaque Pythagoricum illud: *Praeceptor dixit* et grammaticam illam, Capito, rationem approbasse viderur; illam dico rationem, quam olim de suis ipse grammaticus edidit:

Quaerenti causam sit pro ratione voluntas

Affiduusque vsus magnorum grammaticorum.

Quare, cum haec POMPONII oratio, qua Labeo dicitur innouasse quam plurima, Capito autem traditorum studiosissimus fuisse, si non falsa, certe tamen ambigua et obscura videatur, nam eundem Labeonem, diuerso modo, et veteratorem dici et nouatorem posse demonstrauius, equidem ex his Pomponii verbis caput huius dissidii et principalem diuersitatis causam non ausim arcescere. Neque enim satis comprehendi potest, quomodo studium illud nouarum rerum in vno, antiquitatisque in altero, aliquam possit, nedum tantam, in causis decidendis diuersitatem inducere? Haec nos contra MASCOVII sententiam, cuius de cetero praeclara sapientiae monumenta maximopere admiramur, disputauius, non tam resellendi eum studio, quam quod verum a nobis requiritur. Neque vero

vero haec ipsa magna videri debet, sed exigua potius et perquam leuis, ab hoc illustri legum interprete, animi nostri declinatio, quem plurimum tamen, id enim palam liceat profiteri, tamquam delicatioris molliorisque disciplinae antecessorem sequimur, cuiusque detrudere nec vlllo modo possumus, nec volumus vquam,

Haec tamen capiti multa cum laude coronam.

§. V.

Iam illorum rationes videamus, qui non, vt superiores, a *Quidam ab ingeniorum diuersitate.* philosophiae diuerso genere, neque ab aemulatione, sed a morum diuersitate ipsaque constitutione corporis huius haereseos causam reperiunt. Medici sane a sanguine et temperatura *quatuor humorum in corpore humano, qui constant ex quatuor elementis,* (his verbis enim eos INNOCENTIVS 111. Pontifex Maximus designat, c. 8. X. de *consang. et affin.*) in ipsa mente hominum diuersas saepe opiniones exoriri tantum non omnes statuunt; neque omnino videtur alienum a vero MALBECCII decretum, qui in *Princ. Phys. Ration. et Passion. hom.* ita philosophatur: *Si partes solidae hominum perfecte similes forent, si idem sanguis per venas fluere, si sensationes vniiformes per impulsu corporum ambientium sustinerent homines, si omnium eadem foret educatio, omnes eruditos eadem, nec oppositas sententias habituras esse.* Duplex autem potissimum genus est, vnum voluptariorum leuiorumque hominum, quos, cum exuberans sanguinis copia et illi, qui esse in nobis dicuntur, igniculi, hilariores alacrioresque faciant, in nulla cogitatione diu consistere solent, sed vbicunque leuissima species commouet animum, ad quaelibet facile abripiuntur. Hos leues homines ac molles videas ad misericordiam et aequitatem multo proniores esse, quam Heraclitos et Catones illos, qui in vita sua duri et inclementes, sapientem numquam misereri, non opinari, statuunt. Alterum est genus eorum, qui tristiori ingenio nati in rebis nouis plerumque haesitant, et diuersitates rationum ab origine causisque primis vbique repetunt. Qui vero ita est ad seueritatem a natura compositus, non tantum oculis et fronte rugosa totaque facie, sed etiam sermone ipso, nam abstrusus dicendi genus et verborum antiquitates placent, ingenii tristitiam exprimit.

Laudat praeteritos, praesentes despicit annos,

Hoc tantum rectum, quod facit ipse, putat.

Sane, quo quis subtilius conicit et res comprehendit intelligitque penitius, eo praefractor esse solet, eoque difficilior a notitiis semel comprehensis

hensis se iungi se diuellique parietur, vt Herculi citius clauam, quam his diu probatas intellectasque sententias, extorquere possit.

Haec si ad sectarios nostros accommodemus, CAPITO quidem hilaris, vrbanus ac popularis homo, vtiliora potius et temporibus apta, quam abstrusa, proferre solebat. Nouae dominationi, per quam ei potenti esse licebat, quantum studuerit, et quam in absurdam ac paene dixeram seruillem adulationem progressus sit, satis haec a nobis subiecta exempla demonstrabunt. Scribit TACITVS libro tertio *Annalium* cap. LXX. *Lucium Ennium, equitem Romanum maiestatis postulatorem, quod effigiem principis pronisuum ad vsum argenti vertisset, recipi Caesar inter reos vetuit, palam aspernante Atteio Capitone, quasi per libertatem. Non enim debere eripi patribus vim statuendi; neque tantum maleficium impune habendum; sane lentius in suo dolore esset, reipublicae iniurias ne largiretur. Intellexit haec Tiberius vt erant magis, quam vt dicebantur, persiluitque intercedere. Capito insignitior infamia fuit, quod humani diuinique iuris sciens, egregium publicum et bonas domi artes debonestauisset.* Haec satis Capitonem leuitatis arguunt, meritoque infamis, qui ita facta sua didaque omnia ad gratiam Caesaris componebat, vt seruire magis, quam viuere videretur. Non minus illud memorabile est eiusdem assentationis ac leuitatis indicium, quod ex SVETONII, *de illustribus grammaticis, capite XXII.* proferam. Scilicet Tiberius Caesar, cum aliquando in edicto posuisset verbum minus latinum et rursus expungere vellet, idem Capito hoc minime dicebat opus esse, vsuros enim esse ciues eo vocabulo, postquam principi excidisset. Sed M. Pomponius Marcellus, grammaticus nempe, qui erat sermonis latini molestissimus exactor, sic satis argute respondit: *Tu quidem Caesar dare potes ciuitatem hominibus, verbis non potes, simul Atteio Capitori assentationem, et Caesari nimiam illam in conferenda ciuitate liberalitatem exprobrans. Eamdem cum meminerim recentiori tempore actam fuisse fabulam, non possum mihi temperare, quin hoc loco, tametsi haec otiosa nonnullis videri possit adiectio, huc transcribam, quae de imperatore Sigismundo MARTINVS CRYSIVS in Sueuicorum Annalium Parte III. libro VI. capite X. retulit: Anno MCCCCXIV. quia tres papae adulterini erant, atque Hussitica doctrina auctoritati pontificiae plurimum detrahebat, concilium Constantiae coeptum est celebrari. Ad quod cum Caesar Sigismundus veniret, dixit ad Patres: Date operam, vt illa nefandissima schisma eradiceatur. Tum respondit quidam: Serenissime Caesar! schisma est generis neutrius.*

trius. Quis hoc dicit? quaerit Caesar; respondet alter: Alexander Gallus. Caesar rursus: et quis iste Alexander? responsum est: monachus. Retulit Sigismundus: et nos Rex Romanorum, ideoque maioris auctoritatis. Nonne instituire possumus nouam grammaticam? Haec de Capitonis leuitate.

At bone deus! quantum ab eo distabat et in alia omnia conuertebatur LABEO. Huius tanta in conseruanda libertate constantia, vt Augusto iam principe et rempublicam obtinente, veritus non sit, hostes etiam Augusti laudare et in senatum allegere. Satis aliquando inciuiliter, cum, sicuti DIO libro LIV. commemorat, mentio facta esset in senatu, vt senatores Augustum per ordinem singuli custodirent, ita sententiam dixit: Quid ceteri facturi sint, se parum curare; ipsum autem se somnolentum esse et valde stertere, adeoque excubis his agendis parum idoneum videri. His factis fieri aliter non potuit, quin, cum parum ipse memor esset illius conuiuialis legis in omni vita obseruandae: ἡ πῖσι, ἡ ἀπῖσι, nulloque modo nouae dominationi adfuefacere animum posset, ipse contemptior, eius autem colluctator apud Caesares gratiosior esset. Itaque apud principes Capito, apud eruditos maioris Labeo auctoritatis fuit.

§. VI.

In tot diuersis, de sectarum ortu, opinionibus, miror neminem *Epicurea* fuisse, qui causam esse omnino nullam diceret. Epicuri haec doctri- *quaedam de* na, cuius in philosophia non modo hoc vniuersum, verum etiam *sectarum cau-* mentes hominum casu reguntur, vtpote qui animorum motum vo- *lis sensentia.* luntarium statuit, vt sine causa saepe velimus et adpetamus aliquid. Nihil ergo, aliquis dixerit, opus est, vt huius dissidii causas operose exquiramus; est enim *naturalis hominum ad dissentiendum facilitas*, vt VLPPIANVS ait, l. 17. §. 6. IV. ff. de recept. et quaerentibus diuersitatis causas HORATIVVS adest, qui hanc mortalium in diuersa procliuatatem, quam naturalem Vlpianus dicit, his versibus indicat:

Trahit sua quemque voluptas.

Castor gaudet equis, oio prognatus eodem

Pugnīs. Quod capitum viuunt, totidem studiorum

Millia.

Accinit HORATIO PERSIVS:

Velle cuique suum est, nec voto viuatur vno.

Si fas est, quidni autem? poetis philosophum iungamus, nimirum SENECAM, qui in epistola CII. contraria hominum et dissimilia iudicia

iudicia his verbis notat: *Putas tu posse sententiam unam omnium esse? Non est unius una.* Quid ergo iurisperitorum factiones miramur, cum in ipsa vita tot studia diuersa sint, nec vlla disciplina habeatur, in qua non magna sit, in contraria abeuntium, ac prope infinita opinionum varietas. M. TERENCEI VARRO, homo sapiens et in rebus indagandis stupendi laboris, quo, Laetantio teste, nemo viquequam doctior ne apud Graecos quidem vixit, iam suo tempore philosophorum ad ducentas octo et octaginta factiones et sectas numerauit, sicuti AVGVSTINVS narrat in libro nono de ciuitate dei, in primo capite. Neque vero in philosophia solum, sed in grammatica etiam, illa tenui ac puerili disciplina, sectae fuerunt, nam et *Grammatici certant.* Nihil dicam de medicis, de quorum sectis CELSVS scripsit; Alii eorum empirici dicuntur, quidam dogmatici. Recenset has medicorum sectas C. PLINIVS H. N. XXIX. cap. I. et hoc postremo addit: *Hinc illae circa aegros miserae sententiarum con-
certationes, nullo idem consensu, ne videatur accessio alterius. Hinc illa infelicitis monumenti inscriptio: TVRBA SE MEDICORVM
PERISSE.* Mutatur ars quotidie toties interpollis; et ingenio-
rum Graeciae flatu impellimur. Palamque est, ut quisque inter istos loquendo pulleat, imperatorem illico vitae nostrae necisque fieri. Meminit illarum et SENECA in epistola XCV. Itaque, inquit, alia est Hippocratis secta, alia Asclepiadis, alia Themisonis.

§. VII

*Nostre de se-
ctis sententia.* Sed nimis diu sumus in aliorum hortis spatiati, iam in memo-
riam illud reuocantes, quod in l. 16. VIII. ff. de seruit. praed. rust.
Diuus Pius aucupibus rescripsit: *Non est consentaneum, ut per aliena
praedia, inuitis dominis, aucupium faciatis,* domum nos quidem et
ad nostras possessiones reuertimur. Tempus enim est, ut nostrum
etiam, quem habemus, huius rei sensum legentibus aperiamus. Ut
breuiter illud et sine circuitu faciam, M. ANTISTIVS LABEO, ut
fuit seuerissimis moribus (§. V.) et tristi ingenio, ita videtur seue-
ram et subtilem disserendi rationem anteposuisse aequitati, ut dicere
possimus; *fuisse eum iuris ciuilis anxie diligentem,* quae verba de
Volusio Maeciano occurrunt l. 17. XXXVII. ff. de iure patron. Ama-
bat enim admirabilem illam, quae olim in iuris disciplina maxima
erat, continuationem seriemque rerum, ut aliae ex aliis nexae omnes-
que inter se definitiones aptae et colligatae viderentur. Nunquam enim
ad id, quod aequitas et commoditas suaderent, oculos reflectebat,
sed in omnibus rebus pulchritudinem artis et amabilem illum gratissi-
mumque

numque rerum concentum, vtili et aequo anteuerat. Cohærere volebat omnia, extrema neclebat primis, vtrisque media, nec committebat vquam, vt vllum iuris decretum, quæ philosophi dogmata, nos regulas vocamus, vtilitatis et æquitatis causa violaretur. Nec vero sine scelere violari regula potest. Si enim vel vna perturbatur, constantia illa artis et pulchritudo perit, adeoque id, in quo summum iuris decus versatur, et ipsa arx iustitiæ proditur. Has ergo ob causas factum est, vt sapiens hic admodum seuerus et religiosissimus iuris argumenta ab æquitate deducta, contra ius subtile, numquam probaret sed tamquam

Capitolii immobile Saxum

Nec Ioui cederet.

Admiror ego in disciplina eius summam maximamque constantiam, et iuris harmoniam. Nihil offendas, quod non subtile et elegans videatur; recta, dura et inflexibilia omnia. Nam cum dictata sua et omnes definitiones ad pompam doctrinæ et dialecticæ subtilitatem referret, cuius peritissimus habebatur, directum in eius disciplina, vni forme, durum, asperum, et certa denique perpetuæque iuris scientia regnant. Subtilis in differendo et in concludendo cum esset acerrimus, parum quidem commouebatur, si summum, quod numquam deferrebat, ius, summa aliis videretur iniuria: non ignorans, dura quædam esse, quæ statueret, sed necessaria tamen et consentanea doctrinæ. Sic sapiens noster in omni causa, vt cum poeta dicam,

Iusto trutinæ examine pensat,

Ne quid biat, ne quid protuberet, angulus acqui

Partibus vt coeat, nihil vt declinet amissis.

At C. ATTEIVS CAPITO, de cuius leuitate superius dictum est, cum animaduerteter, non posse illam dialecticam in iure seueritatem consequari, quin sæpius ex hoc summo iure summa redundet iniuria, in alia omnia discedere: irridere ac spernere doctrinæ dignitatem: Labeonis seueritatem, nec non apices illos et perplexi iuris tendiculas in inuidiam vocare; Non ex subtile argutoque iure, sed ex æquo et bono rem iudicari oportere; scriptum sequi calumniatoris esse, iuris periti autem et boni iudicis, æquitatis defendere auctoritatem. Itaque multo superiori remissior, vtrumque eum leuis afflat aura æquitatis, pallium mutat, artem pro nulla habet, ius reddit incertum, rationem civilem subuertit, regulam deprauat, scientiam funditus tollit. Mittere eum leges quam sæpiissime videas sub æquitatis iugum, et ad maiorem simplicitatem iuris naturæ et

C

gen-

gentium, sine ut dici solet, ad aequius meliusque iustitiam reuocare. Haec ille cum faceret, scientiam prope omnem tollebat, nec enim scientia potest esse, sed opinatio mera in eo, cuius omne iudicium a circumstantiis pendet. Non enim facta ad ius, sed leges ad facta inflectit, et quoties aequitas postulat, illico et supplet, et frangit, ampliat, restringit,

Destruit, aedificat, misceat quadrata rotundis.

Possumus igitur huius sectam decisoriam et quasi fluctuantem, immo si placet, *Arbitrariam* vocare, quod non sub formula legis, verum ex aequo et bono iudicat; illam vero alteram Labeonis familiam, nouo ad id verbo excogitato et inaudito antea, *Iudiciariam* dicemus.

§. VIII.

Quid sit summum ius?

Ex his quamquam aliquantulum intelligatur, quid inter utrumque inter sit? nobis tamen, quibus adcuratius, quam fecerunt alii, haec pertractare constitutum est, necessarium videtur, ut hanc complicatam aequitatis et summi iuris notionem vltiori sermone euoluamus. Primo igitur, quid sit summum ius? deinde etiam, quanam sit ratio aequitatis? videamus.

Non possumus autem hanc summi iuris notitiam acquirere melius, quam si LABEONIS facta, qui ei inter omnes maxime studuit, atque doctrinam ipsam perscrutemur. Iam enim causas videamus, quae Labeonem, ut aduersus aequitatis patronos illud summum et subtile ius defenderet, impulerunt. Animo scilicet cum Labeo altius scripti iuris origines et causas repeteret, vidit, eam in primis ob causam leges scribi coepisse, quod illae insitae in animo aequi et iusti notitiae iudicii exercendis non sufficerent. Raro enim homines in iudicio de aequo et bono conueniunt, quod non solum ex iudicantium diuersis, de re eadem, sententiis, verum etiam ex ipsa litigantium contentione manifestum est, quorum vterque se quidem iusse, alterum vero temere altercari, existimat. Itaque sola ratio et naturalia praecepta reipublicae administrandae cum non essent satis idonea, nec umquam satis constitui posset, quid oporteret, certa forma, ad quam viueremus, instituta est. Nec enim incerto iure populum gubernari placebat. Hinc iura constitui et leges scribi coeperunt. Optime hanc naturalium in ciuitate regenda molestiam et importunitatem designauit vetus in Saxonia iureconsultus, MELCHIOR AB OSSE in libro, quem, quod scriptorum suorum postremum esse voluit, suum *Testamentum* vocauit. p. 41. Audiamus hominem: *Man findet Leute, die fürgeben, man möge die Ordnung beschriebener Recht und Gesetze, durch Billigkeit, wie ein iedlicher in seinem Verstande befindet, mildern,*

deru, und also die Schärfe der Rechte mit der Billigkeit und Aequität laiyisches Verstandes vermischen, - - - dadurch würde auf einem Fall mancherley widerwärtige Oerterung im Lande gefallen, - - - Und wiewohl alle vernünftige Rechte aus dem Brunn und Quell natürlicher Billigkeit und aus vernünftigen Ursachen herfließen, so ist doch solcher menschliche Verstand bey keinem Menschen so rein und vortreflich, daß er den beschriebenen Rechten und Gesetzen, so durch vieler weiser Leut unpartheyisch einträchtig Bedenken geordnet, vorzuziehen. - - - Denn es dünkt manchem eine Sache billig seyn, die doch im Grund zum höchsten unbillig und ungerecht ist. Ein Mensch kann bald durch unordentliche Neigungen geblendet werden, darum es besser ist, bey dem Richtscheid zu bleiben. Quare cum, in tot discrepantibus hominum circa bonum et aequum sententiis, nihil vniquam certum ac definitum sit, leges scriptae fuerunt, vt ne iudicantium lubrico fluctuantique arbitrio, sed certo iuri ac firmis regulis vitae reorum et fortunae subiicerentur. Ab his, quae quidem certissime vera sunt, suum primum decretum, a quo deinde longe plurima consequuntur, LABEO mutuatus est: scilicet

I.) *Iuris ciuilis summam dignitatem et praecipuum decus esse, si certum sit.* Nihil enim interest, vtrum nullae, an incertae leges sint? Luculenter NERATIVS, quem sub Labeonis signis militasse notum est, in l. 2. XXII. ff. de iur. et fact. ign. scribit: *Ius finitum et esse potest, et debet.* Praestat autem et multo satius est, certum ius habere, quam aequum, et nullas potius Romani leges, quam ancipites et irritas voluerunt. Cum igitur, vt diximus, maximum iuris decus in firmitate ac constantia versetur, ex eo porro collegit Labeo:

II.) *Scripto tenacius inhaerendum, immo illud rationi anteponendum esse.* Nam, si a scripto recederetur, et rationi leges subiiicerentur, rem putauit ad pristinam redire iuris naturalis et aequitatis causam, quam turbulentam, inchoatam tantummodo et imperfectam, mancnam, et iudiciis exercendis parum idoneam esse, superius dictum est. Hanc Labeonis regulam ipsi in sanctissima religione nostra, aduersus CALVINVM, qui rationi plurimum desert, nos, qui LUTHERI dogmata et litteram pressius sequimur, maximopere probamus, atque comparatione facta eadem propemodum inter hos cultus diuini restauratores, quae inter Labeonem et Capitonem fuit, intercedere diuersitas videtur. Ex his intelligi potest, quamobrem scriptum saepius contra aequitatem et rationem nominetur. CICERO sane in oratione pro Caecina, verba et litteras cum summo iure componit.

Si contra VERBIS ET LITTERIS, ac ut dici solet, SUMMO IURE contenditur. et eodem loco scriptum opponit aequitati, quando dicit: *ab VERBO et a SCRIPTO plurimis in rebus aequi bonique rationem esse seiuuclam.* Simili ratione VLPPIANVS l. 20. in fin. XII. ff. de reb. cred. subtilitatem verborum commemorat, eamque committit cum aequitate. Haec, ait, intelligenda sunt propter subtilitatem VERBORVM, benignius tamen est, utrunque valere. IVSTINIANVS autem l. 2. §. 1. C. de const. pec. antiquam iurisprudentiam et ipsam Labeonis familiam, quae non voluntatem mentemque legis; sed potius scriptum amplectitur, his verbis notat: *Sed ut subtilitati eorum satisfiat, qui non sensum, sed vana nominum VOCABULA amplecti desiderant.* Scripto igitur, ut ius certum euadat, tenacius esse inhaerendum esse, ille statuebat. l. 29. XXXII. ff. de legat. 3. Cum autem multiplex potestas saepe verborum sit, ut etiam QVINTILIANVS VII. Instit. 9. scribat: *Nullum esse verbum, quod non plura significet*, maximus acrobodicaei labor esse debet,

III.) *ut subiectae verbis notiones accuratissime finiuntur*, ex quo euenit, ut potissimum iurisconsulti maxime diligent proprietates verborum; nam his, (vt IVSTINIANVS §. 5. I. quib. mod. testam. ait.) commodius visum est, singulas causas singulis appellationibus distinguere. Non possunt autem proprietates verborum melius erui, quam si in originibus vocabulorum attendamus. Hinc -

IV.) *studiose exquiris Labeo, unde verba ducta sint?* Id studium, verbi notationem CICERO, Top. VIII. appellauit: *Multa etiam*, inquit, *ex notatione sumuntur*; ea est autem, cum ex vi nominis argumentum elicitur, quam Graeci ἐτυμολογία vocant. Multa igitur in disputando notatione eliciuntur ex verbo, ut cum quaeritur, *Postliminium quid sit?* Labeoni autem curam verborum maximam fuisse, ostendit GELLIUS. XIII. 10: cuius haec verba sunt: *Labeo Antistius iuris quidem civilis disciplinam principali studio exercuit, et consulentibus de iure publice responsit, ceterarum quoque bonarum artium non expertus fuit, et in grammaticam sese atque dialecticam litterasque antiquiores altioresque penetraverat, Latinarumque vocum origines rationesque percalluerat, eaque principia scientia ad enodandos plerosque iuris laqueos utebatur. Quamquam vero in iurisprudencia, verborum origines et proprietates nosse, et ad conferuandum doctrinae splendorem, et ad legum interpretationem, et ad respondendum vim habeat, et quomodo ex origine vocis Labeo: plerosque iuris laqueos, ut Gellius scribit, enodare potuerit, exemplo demonstrabimus.* Quae rebus inter iuris peritos:

vt rum

verum, si quis alterius domum clam occuparet, haec contrestatio, furtum dici possit? SABINVS, qui non a verbis, sed ab aequitate et natura rerum argumenta ducebat, erat enim Capitonis assecla, in libro de furtis, teste eodem GELLIO XI, 18. non hominum tantum et rerum mouentium, quae auferri occulte et surripi possent, sed fundi quoque et aedium fieri furtum statuit, furem existimans eum, qui clam domino rem qualemcumque subtraxisset; At PROCVLVVS, qui Labeonis dogmata probabat, et huius iudiciariae sectae ampliator maximus et patronus habebatur, verbis inhaerens, non posse furtum, quod ab auferendo uomen habeat, fieri, nisi earum rerum, quae auferri et de loco in locum moueri queant, statuit. l. 38. in fin. XLI. ff. de usurp. Si praeterea, aliud quis exemplum, quo demonstrari possit, iurisconsultos ex verbi notatione plurimas causas decidisse, desideret, adeat PRAESIDIS Grammaticas Observationes ius ciuile illustrantes. Specim. I. Obs. X. Dictum est hactenus, Labeonem, vt perpetuitatem doctrinae et iuris constantiam conseruaret, in primis in verborum originibus enodandis et circumscribenda uocum potestate occupatum fuisse; nec tamen uerba solum, uerum etiam

V.) *propositiones et decreta, quae nos regulas vocamus, inconcussa ac perpetua esse uoluit*, utpote qui propter aequitatis causam numquam se ab iis diuelli pateretur, sed omnia potius effata ac responsa sua ad leges et receptas iuris sententias componeret nihilque magis uereretur, quam ut aliquid definiret, quod uel leuiter in aliquo illam suauissimam iuris harmoniam laederet. Itaque nullam ob causam leges inflectebat: nulla eum facies rerum, nulla occasio a recto auerteat, sed utcumque aderant personae, ius aequabiliter inter omnes tribuebat.

VI.) *Utebatur ergo arithmetica proportionem*, quae non secundum dignitatis ac personarum conditionem, sed aequaliter omnia meretur. CAPITO e contrario secundum *geometricam proportionem* iura reddebat, utpote qui locis et temporibus adcommodata iudicia exercebat. PLYTARCHVS *περί Φιλαδέλφειας* capite XII. *geometricam* proportionem extollit prae *arithmetica*, et secundum eam Lycurgum rem publicam suam administrasse tradit in libro VIII. *Συμποσιακῶν*; sed Labeo siue discrimine summis et infimis, omni loco omnique tempore eadem iura dirimens, omnia recta et inflexibilia exigebat. Quae nos hucusque demonstrauius, eo collineant omnia, ut summam Labeonem operam nauasse intelligi possit, quo ius certum et

perpetuum efficeretur. Multum, putabat enim, ius certum iuri aequo praestare. Habet autem haec Labeonis doctrina secum duas res, vnam commodam, alteram vero incommodam. Nempe

VII.) *commodum, quod hanc doctrinam comitatur, est pulchritudo artis* et quidam ordo vniuersi concentusque iuris; quem §. VII. descripsimus. Incommodum vero, quod ex ea consequitur, illud, quod

VIII.) *saepe summum ius, summa euadit iniuria.* Fieri enim solet, vt, quoniam leges non in singulas causas sed generatim scribuntur, id, quod generaliter aequum est, tamen in hac vel illa causa aequum non videatur. Non enim vno collyrio omnibus possumus oculis mederi, nec vlla lex aut senatus consultum ita scribi potest, vt omnes casus, qui quandoque inciderint, in eo contineantur. Satis, vt opinor, accuratam de summi iuris ratione ex his intelligentiam consecuti sumus, quare nihil praeterea nisi hoc notamus, hoc summum ius, in libris nostris, saepe etiam interpretationem strictam, subtilitatem, iuris rationem, duritiem, rigorem, asperitatem, scrupulositatem, ciuilem aequitatem, (quae naturali opponitur), apices iuris, scriptum, anxietatem atque nimiam niiseramque diligentiam adpellari.

§. IX.

*Quaenam sit
aequitas?*

Iam anquiramus, quid sit aequitas? Res ardua profecto et difficillima, quandam huius atque veram imaginem breui oratione describendi. Nam aequitatis notio ex earum genere, quas se omnino tenere vnusquisque putat, licet eandem aliis satis scite vix vllus possit explicare. Tam vage, peritos etiam, et varie de ea videas loqui, vt quo magis in eorum descriptiones quis attendat, eo magis audientis distrahat in ambiguum animus. Dicitur ea saepius: bona fides, humanitas, commoditas, benignitas, naturalis iustitia, mediocritas, vtilitas atque simplicitas. EX ARISTOTELE si, quid illa sit? quaeramus, responder: aequitatem esse *ἐναντίον τῷ νόμῳ διόριστον*, siue correctionem legis in ea parte, qua propter vniuersalitatem suam deficit. Esse enim boni et aequi interpretis, ait, ea quae a legislatore omissa sunt, humaniter supplere et leges ad factorum species attemperare vtiliter, ac omnino facere, quod legislator ipse facturus videatur, si praesens esset; vtque legem scripturus fuisset, si hanc facti speciem animo praecuidisset. Videtur IUSTINIANVS §. 3. I. de legit. agn. tur. ad hanc Aristotelicam aequitatis definitionem respexisse; laudans enim

enim iuris honorarii aequitatem, praetores vocat *paulatim asperitatem iuris civilis corrigentes, siue, quod deerat, implentes humano proposito.* et CICERO pro Cluentio capite XXXIII. aequitatem vocat *laxamentum legis.* Haec Aristotelis definitio quamquam aliquid ex vero habeat, tamen, cum non omni ex parte sit euident, illustranda est nobis et paulo copiosius explicanda. Videamusigitur, qualem CAPITO doctrinam instituerit.

Primo quidem is cum intelligeret, plura in vita negotia, quam leges et rerum vocabula adesse, *l. 4. XIX. ff. de praescr. verb.* neque fieri posse, ut propter infinitatem rerum leges et senatus consulta ita scribantur, ut omnes casus, qui incidere possint, comprehendant; *l. 10. l. 12. I. ff. de legib.* Nam de his, quae semel forte aut bis accidere solent, iura non solent condi, sed de iis, quae plerumque fiunt, ut THEOPHRASTVS dixit, *l. 3. l. 4. l. 5. l. 6. ff. eod.* accidere interdum potest, ut propter quasdam circumstantias, (vtamur enim hoc vocabulo,) saepe lex, si generatim spectetur, iustissima videatur, huic tamen et alteri grauis. Hoc ipsum est, quod veteres dixerunt: summum ius, summam crucem et summam malitiam esse. Non raro itaque lex, quando tamquam forma quaedam de materia detrahitur, et in animo generatim concipitur, omnino aequa videri potest, sed in hac vel illa persona iniqua. Nam et medici aphorismis et praeceptis suis non omni tempore vtuntur. Tamen si enim regulam et generale praeceptum habeant, hanc vel illam herbam febrī cuidam mederi, tamen interdum illam adhibere prohibentur, ob alios quosdam vicinos et circumstantes morbos, qui si adsunt, effectura quidem herba est, ut febris pellatur, sed excitabitur fortasse vnus ex circumstantibus morbis, ipsa febris multo perniciosior. Idem cum in legibus fieri solet, Capito decreuit:

1.) *Personas et causas singulas nos intueri oportere, neque generum ipsorum vniuersali consideratione, sed speciali vtendum esse, vtque medicus interdum abiiciat regulam, ita propter temporum factorumque varietatem, quae omne ius immutent, interdum recedendum esse a lege, ne, si eam aequaliter vbique applicemus, iniquitas quaedam et iniuria, tamquam morbus, oriatur.* Notabis ergo

II.) *Capitonis doctrinam omnino a locis, modis, temporibus et personis, et vt verbo dicam, a circumstantiis dependere.* Ita aequitatem finit EVSTRATIVS ad Aristotel. VI. Nicom. XI. §. 5. Nam ita ait: *Aequanimus appellatur cum personis, rebus, causis et modis accommodata iudicia*

iudicia exercet. Similiter l. 14. §. 6. XI. ff. de relig. VLP IANVS: *Aequum autem accipitur ex DIGNITATE eius, qui funeratus est, ex CAVSA, EX TEMPORE, et EX BONA FIDE.* Idem VLP IANVS l. 12. §. 1. VII. ff. de usu et hab: *Aliquando largius cum usufruario agendum est, pro DIGNITATE eius, cui relictus est usus.* ad l. 3. §. 2. XXII. ff. de test: Conuellendam ergo ob eiusmodi causas scripti legis non raro auctoritatem, in prius autem ob personarum dissimilitudinem ius inspicendum esse, Capitoni videbatur, si quidem hominum alius sit excellens, alius humilis; ille sacerdos, hic profanus; miles alius, alius rusticus; minor vel maior viginti quinque annis; mulier; senex; infans; impubes. Vt rem omnem teneamus, ecce l. 16. XLVIII. ff. de poen. CLAUDIVS SATVRNINVS: *Haec, inquit, genera consideranda sunt septem modis: causa; persona; loco; tempore; qualitate; quantitate et euentu, quae singula deinde exemplis illustrat.* Iam quia aequitas non eadem omnibus iura, sed diuersis diuersa tribuit, apparet

III.) *hic proportionem geometricam conseruari.* Hanc vero ob causam, quoniam aequitas facta potius et res singulares contemplatur, quam vniuersales, indefinita illa erit, nec vlla reperietur in aequitatis defensore certa scientia, sed opinatio mera. Scientia quippe constans est et difficulter mobilis; opinatio autem vaga et facile mobilis. Est vero, vt philosophi finiunt, opinatio eiusmodi cognitio rerum, quae non necessariis, sed tantum probabilibus principiis nititur. Saepe ergo cum VLP IANO, l. 15. §. 32. XXXIX. ff. de damn. inf. dicendum erit: *Ego causa cognita, modo hanc, modo illam sententiam probandam iudico.* Hinc constat

IV.) *Aequitatis defensores nihil in perpetuum neque generaliter definire posse,* sed indefinita iis pleraque et mutabilia esse. Nam de iis, quae in aequitate consistunt, nihil in perpetuum neque generaliter definiri, SCAEVOLA dicit. l. 14. XLIV. ff. de diu. et temp. praesir. quocum et SENECA facit, cum: Iuris regulam esse certam, aequitatis vero insinuatam, dicitur. Plane: *Diuis Pius Tullio Balbo rescripsit, an mora facta intelligatur, neque constitutione vlla, neque iuris auctorum quaestione decidi posse, cum sit magis facti quam iuris.* l. 32. XXI. ff. de usur. Ex his porro consequitur, eosdem aequitatis patronos

V.) *regulas iuris atque constantiam artis flocci pendere.* Quemadmodum enim in Labeonis doctrina recta et inflexibilia omnia habentur, et singulae res apte inter se et eleganter coniunctae sint, ita in alia omnia dissen-

discēdens Capito hanc commissuram artis constantiamque doctrinae saepe subuerit, et mox intensis nimis, mox remissis quasi iuris fidibus, cacophoniam miserabilem edie, et pro utilitate hominum iura singularia multa quae noua inducit et monstris similia. Infiguntur hac ratione huic pulcherrimae arti quasi vulnera quaedam ac insanabiles plagae, vt iure Capito perfoffor regularum et sententiarum perturbator dici mereatur. Nam SABINI, quem Capitonis castra securum nouimus, illud est, quod l. 1. l. ff. de reg. iur. dicitur: *Regula cum in aliquo uitiata est, perdit officium suum.* et alius Capitonis afflecla, IAVOLENVS l. 202. ff. rod. ait: omnem in iure ciuili definitionem periculosam, et nullam fore regulam esse, quae non subueriti possit. Quare, cum aequitas semper personas, causas, loca, euentus, et tempora perpendat, illico pater:

VI.) *Aequitatem circa singularia versari, Ius circa uniuersalia*, neque aequitatis defensores ius PER SE, sed EX REORVM PERSONIS, quae negotio aliquo continguntur, considerare, vt dicit TRYPONVS l. 31. §. 1. XVI. ff. de pos. Quia autem hac ratione nihil scripto iuri defertur, sed ratio praefertur litterae, sequitur, si rem secundum aequitatem consideremus, iusticiam omnem redire ad pristinum iuris naturalis statum, vt hoc modo iacentes et calcata scripti iuris auctoritate, perinde sit, ac si leges omnino nullas haberemus. Sic

VII.) *quando secundum ius naturae et gentium causas decidimus, hanc Aequitatem merito dicemus.* Plane enim aequitas, naturalis ratio; ius summum autem, ciuilis ratio audit. l. 31. XVI. ff. de pos. Intelligitur ex his illa Ciceroniana definitio: *Aequitas est, quod naturalis ratio persuasit.* et in Partitionibus oratoriis capite XXXVII. ait: *Ius diuiditur in duas partes primas, naturam et legem.* Cum autem quasdam iusti et honesti notitias ipsa natura in animos hominum iusculperit, siue, vt PAVLVS dicit, in corda hominum scripserit, sequitur aequitatis cognitionem esse vulgarem ac popularem sapientiam, scientiam iuris, acutam. Nam de aequo et bono vnusquisque bonus pater familias, imo olitores iudicare possunt; de ciuili autem iusticia periti tantum et plurimum exercitati, vt recte QVINTILIANVS, *Aequitatem optimo cuique notissimam esse*, dixerit. Est autem iuris naturalis haec praeceptio, vt, in singulis causis, singulas circumstantias ponderemus. Quot ergo lites et quaestiones, tot definitiones totidemque non perpetuae

sed quasi fortuitae regulae. Ecce enim vniuersum ius naturae, quousque patet, vnam solum perpetuam regulam, sed maxime generalem, seruare videas, nempe hanc: ne tute facias, quod pati ipse nolis. ex quo colligimus:

VIII.) *Aequitatis hanc quasi summam esse, ut ipse quod pati nolumus, de aliis ne statuamus.* Ita enim in Epitome ad Pentadium, capite LX. §. 12. LACTANTIUS: *Radix et omne fundamentum aequitatis est illud, ut non facias, quod pati nolis, sed alterius animum de tuo metiaris.* Summa igitur eorum, quae hucusque a nobis disputata sunt, eo omnis redit, ut in discernendo summo iure ab aequitatis notione, naturam a scripto separare debeamus. Nam si vnice scriptum intueamur, cum leges non in singulas causas, sed generatim scribantur, et si quis ad facta et personarum dignitates nullatenus attendat, fieri aliter non potest, quin summum ius, summa euadat iniuria. Id CAPITO animaduertens, a scripto saepe recedendum esse statuit. Nam etsi in vtilitatem hominum, iura scripta fuerint, nefas tamen, arbitratus est, si ea, quae salubriter pro vtilitate hominum introducta sunt, duriore interpretatione contra ipsorum commodum producamus ad seueritatem. Hinc causas, modos, tempora, loca, euenta et similia quaedam in omni facto expendi voluit, et omnino procurari, ne in alios quid statuamus, quod nos ipsi detrectaturi simus. Rem omnem complexus est vetus ille grammaticus, AELIUS DONATUS, qui ad Terent. Adelph. act. I. sc. I. ita annotat: *Ius strictum est, quod omnia recta et inflexibilia exigit; aequitas vero est, quae de iure multum remittit.*

§. X.

De successoribus utriusque. Quas haecenus enumerauimus, de aequitate et subtili iure, diuturnas Labeonis atque Capitonis discordias, PROCVLVS deinde, qui a SABINO; et PEGASVS, qui a CASSIO dissidebat, tractando augendoque multo maiores illustrioresque fecerunt. Audiamus POMPONIVM: *Arteio Capitori Massurius Sabinus successit, Labeoni Nerua. Sabino successit Cassius Longinus; Neruae successit Proculus. Sed Proculi auctoritas maior fuit. Nam etiam plurimum potuit, appellatique sunt partim Cassiani, partim Proculiani, quae origo a Capitone et Labeone coeperat. Cassio Coelius Sabinus successit,*

fit, Proculo Pegasus. Coclio Sabino Priscus Iauolennus; Pegaso Celsus; Patri Celfo Celsus filius et Priscus Neratius; Iauoleno Prisco Aburnus, Valens et Tuscianus item Saluius Iulianus. Haec narratio vt melius intelligatur, hanc quasi generationem oculis subiiciamus.

Sub Augusto.

CAPITO LABEO

Sub Tiberio.

SABINVS NERVA Pater

Sub C. Claud. Ner.

CASSIVS PROCVLVS

Sub Vespasiano.

CAEL. SABIN. NERVA Filius
PEGASVS

Sub Tr. i. et Hadr.

PRISC. IAVOL. CELSVS Pater
ABVRN. VALENS CELSVS Filius
TVSCIANVS PRISC. NERAT.
SALV. IVLIAN.

§. XI.

Neque tamen hos duos existimandum est, primum in iure se iam ante Laeas constituisse. Sparsum enim longe antea semen discordiae ^{beon. et Capis.} illius, quod, cum aliquo tempore quasi occoecatum iacuisset, tandem ^{idem diffidant} Augusto rempublicam tenente, per horum studia, in herbescentem quamdam viriditatem paulo altius fuit elicited. Atque nos verustissimam iudicamus discrepantiam scripti et voluntatis, sumusque exemplis demonstraturi clarissimis, idem dissidium iam antiquissimis inde temporibus in sapientibus obrinuisse. Nam in omni lege cum duo adsint, scriptum videlicet et imperantis sententia, quae saepe latior, saepe angustior esse scripto solet, fieri aliter non potuit, quin, vt ingenia interpretum fuerunt, ita mox scriptum, mox natura et voluntas triumpharent. Solent enim tristiores ac seueri interpretes scriptum, leuiiores autem et humaniores aequitatem potius probare, vt in superioribus (§. V.) a nobis dictum est. Itaque quasi aeternae seclorum ac necessariae causae, nec Romanis sapientibus hae peculiaries ac propriae dissensiones, sed omni fuerunt temporis et populo communes. Scribit PLATO in Minoe: Lacedaemonios

monios leges suas ex Creta petiisse, quas Minos et Rhadamantus in diuersa inclinantes ibidem sciuerint. Sed RHADAMANTVM ple-
ræque secundum aequitatem iudicasse, MINOA autem iudicia seue-
rius ac durius exercuisse, quam ob causam hic ab Homero et He-
siodo iudex in orco mortuorum inducatur, cum de Rhadamanto
idem non fingatur. In Romana historia inuenio apud LIVIVM libro I,
26. in illo Horatii iudicio, qui sororem ferro, Curiatorum victore,
transfixerat, TVLLVM vocari clementem legis interpretem, cuius
auctoritate factum sit, vt Horatius *absolueretur magis admiratione,
virtutis, quam iure causae*, quibus verbis manifeste aequitas signifi-
catur. Ciceronis aetate M. CATO iura ad exactissimam rationis
normam direxisse dicitur, et pro summo iure eum saepius depugnasse,
ipse CICERO in Oratione pro Muraena, *capite XXIX.* indigitat.
Arguit enim eum constantiae cuiusdam ac seueritatis nimiae, quip-
pe qui admodum tenaciter illa Stoicorum tenuerit: *Sapientem gra-
tia numquam moueri, numquam cuiusquam delicto ignorare: neminem
misericordem esse, nisi stultum et leuem: viri non esse, neque exora-
ri neque placari: omnia peccata esse paria, nec minus delinquere eum,
qui gallum gallinaceum, cum opus non fuerit, quam eum, qui pa-
trem suffocauerit: Sapientem nihil opinari, sententiam mutare num-
quam. caue quidquam habeat momenti gratia. Dixisti quippiam;
fixum et statutum est. Sapiens nihil opinatur. Mutare sententiam
turpe est; exorari scelus; misereri flagitium.* Ac omnes prope
CATONES ad incredibilem a natura seueritatem efformati sunt, quod
vel ipsa regula Catoniana demonstrat, per quam ea, quae initio sunt
viciofa, tempore nullo conualescunt. Huius regulae ratio naturalis
reddi nulla potest, eamque ob causam omnino videtur aequitati con-
traria, quemadmodum BALDVINVS *ad reg. Caton.* optime decla-
rauit. Idem CICERO in libro primo de Oratore, *capite LVI.* me-
minit dispositionis cuiusdam, in qua GALBAM refert, multa pro
aequitate contra ius dixisse, CRASSVM autem iurisconsultum, cum
ius summum defenderet, nec par esset differendo, ad auctores confu-
gisse, et idem, quod ipse doceret, in P. Mucii et in Sex. Aelii
commentariis scriptum protulisse. Similiter in oratione pro Caecina,
capite XXIV. Q. MUCIVM SCAEVLAM tam amare et supersti-
tiose verbis scriptae legis haesisse commemorat, vt aequitatem ver-
bis saepe oppugnare visus sit. Huic si addatur, EIVSDEM in
Bruto, *cap. XXXVIII.* de Scaeuola testimonium, dubium esse non
potest

potest vlli, quin Scaeuola summum ius acerrime defenderit; *SERVIVM SVLPITIVM* vero in *V. Philippica, cap. V.* laudat a contrario: *Neque enim, inquit, Sulpitius magis iurisconsultus, quam institutae fuit. Itaque quae proficiscebantur a legibus et a iure civili semper ad facilitatem aequitatemque referebat.* Plane igitur diuersa in Mucio et in Sulpitio studia; in illo durities atque scrupulositas, in hoc facilitas, atque clementia summa. Hanc si inter vtrumque diuersitatem intueamur, ratio reddi potest, quamobrem Sulpitius in notis ad Mucium discessionem ab eo plerumque fecerit, ac ita in eum commentatus sit, vt huius in Scaeuolam animaduersiones non Notae, sed *reprehensa Mucii capita* appellarentur, *GELL. IV. l. 1. 3. §. 6. XXXIII. ff. de penuleg.* Eadem humanitatis laude concelebratur a *CICERONE*, in oratione pro Caecina, *capite XVII. C. AQUILIVS GALLVS*, propterea scilicet, quod iuris civilis rationem numquam ab aequitate sciunxerit. Quam hic *AQUILIVS* autem in aequitatem pronus fuerit, indicio vel illud est, quod de dolo malo formulam, quam Cicero euerriculum omnium malitiarum vocat, contra ius subtile protulit. Confirmat praeterea id, quod de *Q. Mucii* subtilitate et *Aquilii* humanitate narrat Cicero, *LABEO* etiam *l. 29. §. 1. XXXII. ff. de leg. 3.* Cognoscitur ergo, hoc, quod inter Capitonem et Labeonem fuit dissidium, omni tempore ac prope aeternum fuisse, et quamquam imperatorum decisionibus, vt illico a nobis dicitur, illud sectarum studium paulatim deferuerit, tamen postea etiam, licet abolito sectarum nomine, res ipsa nihilominus restitit. Nam *VLPIANVM* Capitoni, *PAVLVM* Labeoni adnumerare non dubito, cuius subtilitas iis, qui eius effata considerabunt diligentius, omnino illucescet. Itaque verissime iudico, quae de Paulo et Vlpiano *GRAVINA*, in libro primo Originum Iuris civilis, *capite LXXV.* his verbis retulit: *Hoc etiam Vlpiano Paulus dissimilis, quod Vlpianus in iuris definitionibus remissior est, et promior ad aequitatem, Paulus vero seuerior et religiosior iuris.* Quid, quod et nostra aetate *VITERBERGENSES* iurisconsulti ob aequitatem suam, vt clementes legum interpretes, vulgo laudantur, habeoque certissime persuasum omnes collegiorum dissensiones non ex alio, quam eodem fonte emanare, cuius rei longe plurima exempla ac testimonia adducere poteramus, si *IOHANNIS STRAVCHII Iurisconsultorum Saxoniorum in sectas hodie abeuntium dissidentes opiniones*, (quae dissertationibus eius vnde triginta ad Ius Iustinianum priuatum, praemissa sunt,) ad suos fontes reuocare animus vacaret,

ex quibus, perfectis a nobis, omnino illud intelleximus, SCABINOS LIPSIENSES prae ceteris iurisconsultorum collegiis, Strauchii tempore, subtilissimos ac severissimos fuisse.

§. XII.

*De Sectarum
interitu et
propensione
imperatorum
in aequitatem
nimia.*

Iam quoniam de sectarum interitu quaedam polliciti sumus, antequam ad probationem sententiae nostrae progredimur, breuiter, quo tempore et quamobrem haec dissidia desierint? ostendemus. Primo si POMPONIVM consulimus, qui locus §. X. a nobis allatus est, SALVIVS IVLIANVS inter Capitonis filios omnium postremus collocatur, ex quo coniectura capi potest non improbabilis, edictum perpetuum, quod hic Sabinianus condidit, sectarum finem attulisse. Nam cum SALVIVS IVLIANVS Sabinianus additus et summae auctoritatis esset, sane credibile, eum in hoc edictum suum intulisse scholae suae primaria decreta. Vfus ille enim in hoc ordinando immensi libertate, ut, quae edictis veteribus deesse viderentur, non raro addiderit *l. 3. XXXVII. ff. de coni. cum emanc. lib.* Itaque perpetuum edictum omnino Sabiniana refertum sapientia, cum postea oratione principis atque Senatus consulto confirmaretur, nec quidquam a praetore villo in hoc mutari posset *l. 13. C. de testam.* eamque ob causam perpetua iuris auctoritas et perpetua iurisdiclio vocaretur *l. 2. C. de restit. mil.* auctoritate illius, ut plerisque videtur, omnino deleta est Proculianorum familia. Quid enim potest clarius esse CALLISTRATIVIS verbis, qui *l. 1. §. 1. XLIX. ff. de iur. fisc.* ita commentatur: *An bona, quae soluendo non sint, ipso iure ad fiscum pertineant, quaesitum est. LABEO scribit: etiam ea, quae soluendo sint, ipso iure ad fiscum pertinere. Sed CONTRA SENTENTIAM EIUS edictum perpetuum scriptum est.* Ac licet fortasse non vno ictu iurisperitorum dissidia prostrata fuerint: nam, dum homines erunt, certum est, easdem inter sapientes discordias fore: (§. XI.) certe tamen nomen sectarum omnino desit, nec post SALVIANVM quisquam reperiatur, qui Sabinianum sese aut Proculianum appellaret. Ab hoc tempore missa est igitur civilis ratio fere omnis sub acquitatis iugum. Accessit praeterea imperatorum nimia ad lenitatem propensio, utpote quorum maximus labor in eo occupabatur, ut ius vetus, acutum illud et subtile, ad maiorem simplicitatem iuris naturalis adducerent. Multa Constantinus, multa Theodosius, multa

multa reliqui radicitus amputarunt, nec nouum est, subtilitates illas : phantasmata, item: prudentiae antiquae ludibria, antiquas fabulas atque aenigmata vocari. Sic enim palam, §. 7. *I. de fideic. hered.* IUSTINIANVS: *Nobis in legibus magis simplicitas, quam difficultas placet*, et in §. 3. *I. de legit. agn. tut. simplicitatem dicit legibus amicam*, et porro: *laudamus praetores suas humanitatis.* IDEM in l. 13. *C. de contr. stip.* *Illam subtili et superuacua scrupulositate explosa.* Ridet praeterea non vno loco, sed vbique fere superstitionem atque subtilitatem eorum, qui non sensum, sed vana nomen vocabula, amplecti desiderant l. 2. §. 1. *C. de const. pec. adde: l. 14. C. de legit. hered. l. ult. C. de legib. l. 7. in fin. C. de inst. et subst. l. 7. pr. C. ad Sc. Trebell. l. 4. pr. C. de lib. praeter. l. 1. C. de nud. iur. Quirit. l. ult. §. ult. in mod. C. de iure dot. l. ult. C. de testam. l. 74. §. 1. XXXVI. ff. ad Sc. Treb.* ibi PAVLVS: *Imperator autem noster, motus aequitate rei, contra petitrice[m] prouocauit.* Nec imperatores solum, verum etiam anteriori tempore praetores, imo ipse Senatus, aequitatis saepe patrociniu[m] suscipere, l. 1. §. 2. *XVI. ff. ad Sc. Vellei. l. 5. XXXVII. ff. ad Sc. Tertull.* Vix ergo erat, vt aliqua iis temporibus gliscere posset dissensio; praesto enim imperatores, qui hos captandae simplicitatis laqueos quasi manu armata, eodem modo, quo ille Macedonicus Alexander Gordium nodum, dissecarent: et quoties quaestio incideret, quae ambiguus haberet explicatus, non iurisconsultos conuocare permissum erat magistratibus, nec ipsis decidere licebat, sed adeunda erant illa sacra principum atque diuina oracula, vt illi saepe in legibus suis, quae in Codice exstant, praeceperunt. Haec deinde rescripta, nimio quodam iurisconsultorum obsequio, tamquam ius generaliter constitutum ad alias proferebantur species, atque illa sententia continuo recipiebatur ab omnibus, quam princeps approbasset, vti ex multis digestorum locis et MERILLII *I. Obs. §.* satis cognoscitur. Ac adeo quidem imperatores antiquam subtilitatem oderant, vt ne quidem regulas veteres in lege noua valere vellent. l. 5. *XXXIV. ff. de reg. Cat.* Quare, cum praeter modum simplicitati aequitatieque studerent, et moderationem in suis scriptis vbique laudarent, euenit inde, vt quemadmodum olim edictum praetoris, iuri contrarium perhibebatur, ita postremis temporibus, *Ius* contra constitutiones principum, tamquam contra *Aequitatem* nominaretur. l. 33. *XXXV. ff. de cond. et demonstr. l. 4. §. 14. XLIV. ff. de doti[m] mali exc.* Sic prostrata Proculi facione Sabinus cum

cum suis obtinuit, omneque ius rescriptis potius ac imperatorum placitis, quam iurisperorum responsis sustentatum fuit. Nec vero, ut opinor, decebat iurisprudentiam, iam prope senescentem contentiosam ac turbulentam esse. Ut enim homines in iuuentute iracundos et feruidos, in senectute quietos ac placidos videmus, ita et civilem disciplinam feruidam esse ac fermentantem minime conueniebat. Possumus vero iurisprudentiam Romanam sic commode, in quasdam quasi aetates, dispartiri, eandemque Romuli temporibus natam fingere, cuius usque ad duodecim Tabulas prima quasi infantia extitit. Cum deinde decemuii ius novum conderent, posita praetexta togam sumsit, adeoque ab hoc tempore, usque ad Augusti aetatem, illius quasi adolescentia ferbuit; quam illa contentiosa et honoris appetens virilis aetas consecuta est; tandem re, Hadriane, imperium tenente

felicior aetas

Terga dedit, tremuloque gradu venit aegra Senectus.

§. XIII.

*Cautiones et
Annotationes
quaedam.*

Iam Sabinianos pro aequitate, Proculianos pro iure depugnasse, id quod potissimum in hac disputatione propositum est, exemplis demonstrabimus ex iure civili depromtis. Quamquam enim iam alii idem vaticinati sunt, ac similia quaedam in suis libris mussitauerint, tamen, qui per documenta haec dilucide et adcurate docuisset, nouimus neminem. Nobis autem hoc loco necessarium videtur, ut ante omnia, illos utriusque scholae affectas non ita agglutinatos praeceptorum sententiis fuisse, quin interdum recederent, Lectores moneamus. Ipse SABINVS interdum cum Proculo, PROCVLVS cum Sabino facit. *l. 1. XXV. ff. de ad. rer. am. l. 8. XLV. ff. de verb. obl. l. 14. XXXIV. ff. de cond. et demonstr. l. 13. XVIII. ff. de in diem addit.* Saepius Labeo et Capito se contra communem praeceptorem OFILIUM exarman. Labeoni adscribitur a Pomponio uterque CELSVS, et tamen adolescens Labeonem ridet. *l. 10. §. 1. III. ff. de neg. gest.* Nec mirum illos quandoque dissentire, nam interdum a se ipse dissidet LABEO. *l. 65. §. 1. et 2. iunct. §. ult. XLI. ff. de adqu. rer. dom.* Quis magis Capitoni atque Sabino applaudit, quam IAVOLENVS? et Labeonis ille tamen, scholae contrariae principis, sententiam probat, *l. 2. §. 17. XVIII. ff. de hered.*

hered. vend. Ex eadem schola IULIANVS, a Sabini declinat sententia, l. 11. XVIII. ff. de in diem addict. E contrario CELSVS, Proculianae, a Pomponio familiae adscriptus, nonne interdum Capitonis et Sabini sententiam laudat? Possunt huius rei innumera prope exempla inueniri. Sic NERVA dissidet a Labeone, l. 1. §. 28. XLIII. ff. ne quid in loc. publ. imo et PROCVLVS. l. 116. L. ff. de verb. sign. Idem PROCVLVS cum Sabino facit, NERVA cum Cassio, et quidem aduersus Neruam. l. 1. XV. ff. de act. rer. amot. l. 3. VII. ff. de usufr. ear. rer. Hic autem NERVA consensit cum Sabino; dissident a Sabino CASSIVS, l. 49. XXXV. ff. ad L. Falc.

Haec annotare debui, ne, si forte vno alteroue loco Proculum benignius, Sabinum et Cassium durius respondisse videamus, quamquam id raro soleat, idcirco hanc sententiam statim subuerti, lectores opinentur. Nam de hoc, quod plerumque solet, non de eo, quod raro accidit, rem ipsam et facta denominamus. Non ergo quemquam moueat, quod SABINI, simplicitatis summae aequitatisque huiusmodi, subtilitas §. 36. l. de legat. ab imperatore notatur, qui ita ait: *Sed haec SABINI scrupulositas nobis non placuit.* Nec porro moueat, quod e contrario PEGASVS, quem durior sententiam, Proculianus enim, amplecti decebat, l. 1. §. 3. V. ff. si pars hered. pet. rationem iuris deserit; dicitur enim, in laudato pandectarum fragmento: *Haec ratio facit. Sed Pegasi sententia utilior.* Ita et PROCVLVS, l. 116. ff. de V. S. aequitatem tuetur aduersus Labeonem. Haec fere mihi exempla, qui plerosque illius scholae loculos summa cum cura et assiduo labore excussit, tamquam exceptiones a regula, obuenerunt. Nec tamen vereor, ne quis propter ea se a veritate absterri patiatur. Nobis certe duae hae aut tres, tu adde plures licet, hirundulae ver nōdum facere visae sunt. In CELSO tamen non dissideor, me ingenium mitius saepius obseruasse, ut initio parum abfuerit, quin aut POMPONIVM, qui cum Proculianis accenseret, erroris incusarem, aut ipsum Celsum transfugam atque apostatam declararem. Quaedam praeterea loca annotauimus, in quibus manifestum est, incuriosissimum illum atque negligentissimum pandectarum architectum, nomina vtriusque scholae ita conturbasse, ut, si Proculiani atque Sabiniani nomen vno in versu obuenerit, saepe, quod Proculianus dixit, Sabinianum dixisse perhibeat. Nec ea quisquam mirari debet. Nam cum *emtoris* et *venditoris*, item *actoris* et *rei* nomen saepius inuerso modo positum

inueniatur, ac plurimi errores ex perturbato verborum ordine, siue Triboniani, siue librariorum culpa in contextum irrepererint, sicuti *CYRACIVS libr. I. Observationum cap. X. et XXXVIII.* docuit, quidni multo facilius in nominibus propriis fieri idem potuit? Sed haec Triboniani, in commiscendis iurisperitorum nominibus peccata, alio tempore et loco commodiori asseremus. Iam enim locus exposcit, ut ad ordinem rerum redeamus et nostram eruditis sententiam exemplis adprobemus.

§. XIV.

*Probationes
sententiae no-
strae*

Naturalem rationem, ea vero est ipsa aequitas, (§. IX. no. VII.) Sabinianis prae civili placuisse demonstraturis, adclamant ipsi huius sectae alumni, et vera esse, quae diximus profiterentur *l. 7. §. 7. XLI. ff. de adq. rer. dom.* ait enim eo loco Gaius: Cum quis ex aliena materia speciem fecerit, *NERVAM* et *PROCVLVM* dixisse, hunc dominum esse qui fecerit; *SABINVM* autem et *CASSIVM* magis naturalem rationem efficere putasse, ut qui materiae dominus fuerit, idem eius quoque, quod ex eadem materia factum sit, dominus haberetur.

Eos diximus, qui aequitatis rationem defendunt, in solum ius gentium (§. IX. no. VII.) et naturalem rationem intueri. Habemus huius etiam rei non ignobile argumentum. Erat inter utramque scholam nota atque satis peruagata de emtione et venditione controuersia, an numo non intercedente, sed alia re, venditio contrahatur? de qua *l. 1. §. 1. XVIII. ff. de contr. emt.* *PAVLVS: Sed an sine nummis, inquit, venditio hodie dici possit, dubitatur. veluti si ego togam dedi, ut tunicam acciperem. SABINVS et CASSIVS esse emtione et venditionem putant; NERVA et PROCVLVS permutationem, non emtione hoc esse.* Manifestum est, Sabinianos hic ad solum ius gentium respexisse, non habita ratione iuris civilis, quod singulas causas, singulis nominibus distinguit. §. 5. *l. de quib. mod. test. infirm.* Hic enim, cum iure gentium, originem emendi vendendique a permutationibus coepisse, *l. 1. pr. ff. eod.* intelligerent, secundum hoc, si togam dederim, ut tunicam acciperem, emtione esse voluerunt.

Memorabilis plane *lex 38. §. 7. XXII. ff. de usur.* in qua haec leguntur: *Si actionem habeam ad id consequendum, quod meum non fuit,*

fuit, veluti ex stipulatu, fructus non consequar, etiamsi mora facta sit. Quod si acceptum est iudicium: tunc SABINVS et CASSIVS EX AEQVITATE, fructus quoque, post acceptum iudicium, praestandos putant. PROCVLVS contra, fructus, ne quidem post litem contestatam, deberi exillinat; cuius quidem dura videtur, sed tamen elegans ratio. Consequitur enim fructus et accessiones rei is, qui dominus est. Quod enim ex re nostra fructus capimus, iure accessionis contingit. Ea enim res, quae gignit ex se fructum, res principalis: fructus vero res accessoria. Adeoque fructus nemo percipere potest, nisi qui traditione vel alio modo factus est dominus. Quare si actionem habeam ad id consequendum, quod meum non fuit, id est, si actionem tantum personalem instituiam, quomodo fructus consequar? Promissa quidem res, sed nondum tradita, ergo nec vllum mihi dominium illius. Non possum ergo ex re promissa consequi fructus, quippe illius nondum dominus. Itaque secundum subtile iuris rationem, si personali actione ancillam, quae promissa est, petii, plus petam, si et partum velim, quem ne quidem post litem contestatam editum, immo si in mora sit, restituere, qui possidet, tenetur. Sed haec PROCVLI subtilitas contrariae sectae disciplicebat, itaque ex aequitate eum praestandum indicarunt.

Regula iuris erat, vt in disiunctiua stipulatione: AVT STICHVM, AVT DECEM SPONDEO, debitoris electio sit, soluere vtrum velit. *l. 10. §. ult. XXIII. ff. de iure dot.* Vnde si aut Stichum aut decem debeam, alterutro dato, solutus sum. Quod si autem per errorem, me sub coniunctione debere existimans vtrumque dederim, dubium non est, qui vnum eorum conditione indebiti possim repetere. Quaeritur autem, an quemadmodum alterutrum soluendi, ita etiam alterutrum repetendi apud me electio sit. CELSVS, qui Labeonis familiae adscribitur, dedit creditori electionem reddendi quem velit, fatis, vt arbitror, subtili ratione. Creditor enim iam debitor factus; Penes debitorem autem electio. IVLIANVS vero, qui agmen Sabinianorum claudit, naturali ratione permotus, dedit vtrumque et decem et Stichum soluendi electionem, repetendi quem velit; quia aequum sit, eundem in repetendo electionem habere, qui habebat in soluendo *l. 10. C. de cond. indeb.* Quamnam putamus IUSTINIANVM in hac contro-

versus secutum esse sententiam? Quam? nisi Iuliani. Non enim Iustiniano subtilitas sed simplicitas probatur.

Si dubium est, isne, qui natus est, vixerit? SABINIANI existimabant, opus non esse, ut infans vocem emitat, sufficiens enim esse, si aliis signis vita probari possit. *l. 3. C. de possib. hered. inst.* Sed PROCVLIANIS, qui omnia eo referebant, ut ius certum efficeretur, haec signa vitae, quae ex motu cordis et anhelitu desumuntur, non satis clara, sed suspecta atque incerta videbantur. Hinc illi, vocem et vagitum, excellentiora signa, exigebant. IVSTINIANVS, ut semper solet, Sabinianam sententiam probat, motus aequitate. Nam fieri posse dicit, ut quis murus nascatur. Cum PROCVLIANIS nostri maiores fecerunt, ita enim in *Iure Feudali Saxonico capite XX.* scriptum est: *Wenn der Son nach des Vaters Tode lebet so lange, daz man sine Stime gehören mac, in vir Wenden des Hufes, so ist er beerbet mit seines Vaters Lene.*

Ait VLPIANVS, in Fragmentis Tit. XI. §. 28. *Puberem autem CASSIANI quidem eum esse dicunt, qui habitu corporis pubes appareret, id est, qui generare potest. Proculiani autem eum, qui quatuordecim annos explevit.* Vetus haec controuersia, quae olim etiam in centumviri iudicio multum iactata est, QVINCTILIANO lib. I. *Inst. c. II.* commemorante: *Vt apud centumviros, inquit, quaeritur: pubertas annis, an habitu corporis aestimetur?* CASSIVS, quem leuitatis et incuriae suae Sabinus heredem reliquit, naturalem rationem et hic secutus, ex generandi facultate et signis a natura impressis corpori, pubertatem iudicauit. Sed quoniam haec naturae notatio incerta, nec in omnibus hominibus eadem, sed diuersa esse solet, PROCVLIANI, qui omnia ad punctum et certam normam exigunt, quorumque maxima cura, ut iura omnibus sint eadem atque legum certae definitiones, (§. VIII. n. I.) statutum ac praefinitum temporis punctum pubertati assignauerunt, et arithmetica proportionem pubertatem eodem omnibus anno tribuerunt. Ius Pontificium, quod, sicuti constat, plerumque aequitati fauet, Sabinum sententiam praetulit *c. 3. X. de despons. impub.*

In accessionis materia, vetus est definitio, ut res minus principalis potiorum sequatur. Hanc regulam LABEO et PROCVLVS constantissime seruauerunt; Ecce enim in *l. 26. §. 1. XLI. ff. de adq. rer. dom.* ita scriptum est: *Proculus indicat hoc iure nos uti, quod et Labeoni placuisset: In quibus propria qualitas expectaretur, si quid addi-*

additum erit, toto cedit; ut statuae pes, scypho ansa, lecto fulcrum, nauis tabula. Tota enim eius sunt, cuius ante fuerant. Hac ratione picturam etiam cedere tabulae, quoniam ei additur, et eius esse oportebat, cui tabula erat. Hoc ciuilis ratio dicitur. Nam rem minus principalem, par est, primariae adiungi. Est autem tabula res principalis, quoniam tabula quidem sine pictura, pictura autem sine tabula consistere non potest. Nam et literae, licet aureae sint, tamen chartis perinde membranisque cedunt, ac solo cedere solent ea, quae aedificantur aut feruntur. Ideoque si in chartis membranisque tuis carmen, vel historiam, vel orationem scripsero, licet oratio plurimum, charta vix festertium numum valeat, huius corporis non ego, sed tu dominus intelligeris. Sed qui aequitati litant, relicta hac subtili ratione in pictura, ad pretium et dignitatem artis respiciunt, et tabulam peruerso modo cedere iubent picturae. Ait enim §. 34. *I. de adq. rer. dom.* IVSTINIANVS, quem Sabinianum esse, §. XII. docuimus, *Nobis videtur melius esse, h. e. vtilius et aequius, tabulam picturae cedere. Ridiculum est enim, picturam Apellis vel Parrhasii in accessionem vtilissimae tabulae cedere.* Aequitati hoc essatum quam maxime consentaneum, sed dissentaneum doctrinae; monstro enim simile et in iure quasi miraculum.

Duram profert PROCVLVS, benigniorem contra CASSIVS sententiam l. 40. *V. ff. de hered. per.* ibi: *Interdum durum est quid enim. Sed hoc iustum esse Proculo placet; Cassius contra sentit.*

Iam declarandum est Labeonem, Proculum, Neratium, et totum denique seuerioris disciplinae chorum, semper illam iuris anxietatem magis et scrupulositatem, quam simplicitatem amplexos fuisse. Nil clarius verbis l. 39. §. 4. *LX. ff. de statu lib.* In quo fragmento IAVOLENVS, qui Capitonis gregem sequitur, diserte ait: LABEONIS sententia *RATIONEM quidem habet, sed alio iure utimur.*

Scripto autem LABEO maxime et verbis adhaesit, ut §. *VIII. no. II.* demonstrauimus. Huius rei exemplum est l. 116. *L. ff. de verb. sign.* scilicet, si ita in testamento scriptum sit: QVISQVIS MIHI ALIVS FILII, FILIVSVE HERES SIT, LABEO dixit: *non videri filiam contineri*, additur in ea lege: LABEO videtur verborum figuram sequi. Placidiore contra ac mitiore testamenti interpretes, mentem testantis potius quam verba cum intuerentur, responderunt: et filias contineri.

Similiter l. 29. §. 4. XXXII. ff. de leg. 3. *SI STICHVS ET DAMA SERVI MEI IN POTESTATE ERVNT CVM MORIAR, TVM STICHVS ET DAMA LIBERI SVNTO.* Si alterum ex his, post testamentum factum testatorali-
nasset vel manumisisset, neutrum liberum futurum, LABEO putat. Verbis hic etiam nimium ille detulit. Neutrum enim vult liberum esse, hanc ob rationem, quod coniunctim dictum erat; Si *Stichus et Dama* in potestate crunt, cum moriar, liberi sunt. Sed aequitatis patroni, eum, qui remansisset in potestate, liberum futurum opinati sunt, quia *id uenti defuncti magis videbant convenire.*

Deinde et hoc diximus, LABEONEM, ut iura certa efficerentur, maxime curauisse, ut verborum certa ac definita potestas esset, eamque ob causam, unde verba ducta sint? anxie perquisuisse. Nam, ut GELLIVS ait, hac arte, hac sola notatione nominis multos iuris laqueos summo ingenio enodauit. Ut ergo constare possit, GELLIVM vera retulisse, fidem huius rei ex corpore iuris faciamus. Respondit LABEO:

Lapidicinas non esse, si lapides ibi non caedantur, l. 77. XVIII. ff. de contr. emt. Viduam dictam esse, quasi vecors, vesanus, qui sine corde aut sanitate esset. Similiter viduam esse, quasi sine duitate, l. 242. §. 3. l. ff. de verb. sign. Donum a donando l. 194. ff. eod. Praeuaricatore ex varia certatione, l. 4. §. 4. III. ff. de his qui not. inf. l. 1. XLVII. ff. de praeuar. Furtum a furuo, id est nigro, l. 1. XLVII. ff. de furt. Turbam ex graeco, ἀνὸ τῷ ὁδοῦ βεῖν, l. 4. §. 2. XLVII. ff. de vi bon. rapt. Possessionem a sedibus, quasi positio, l. 1. XLI. ff. de adq. vel am. Suppellectilem ab iis, quae sub pellibus sint, l. 7. XXXIII. ff. de suppel. leg. Cognatos a communi nascendi initio, l. 1. §. 1. XXXVIII. ff. unde cogn. Sororem, quod scorsim nascitur separaturque ab ea domo, in qua nata est, et in aliam familiam transgreditur, GELLIVS XIII, 10.

Si quis ita pactus sit: CVM MORIAR TIBI INSVLAM AEDIFICABO. Labeoni non tam sententiam, quam verba aucupanti, impossibilis videbatur eiusmodi stipulatio, quae valere non posset. At contrariae sectae discutienti sensum potius et mentem contrahentium, verisimile videbatur, hoc inter eos actum, ut incipiat quidem contra morientem obligatio, soluenda autem sit heredibus. Id quamquam aequum videatur, tamen, si iuris rationem species, nihil ineptius. IVSTINIANVS vero, ille aequitatis summus pro-

propugnator et hic Sabinianis adhaereſcit, qui ductus hac inprimis ratione, *quod nemo tam ſtultus inueniatur, ut putet poſſe aedificium tantum in vno momento borae attolli*, ab heredibus promittentis aedificari inſulam iuſſit. *l. 15. C. de contrab. et committ. ſlip.*

Obruimur propemodum infinita exemplorum atque immenſa copia; Nulla enim fere iuris conſultorum diſputatio et controuerſia, quae his radicibus non excreta videatur. Quid? eorum etiam qui de re quadam in iure altercantur, in plerisque cauſis vnum iure, alterum aequitate niti, videas. Credit vterque ſe iuſte litigare. Vnde hoc? Nempe ille ad ius attendit, hic ad aequitatem. Quemadmodum autem aequitas a iure, ita Sabinianos a Proculianis diſtare diximus. Vtque hi ſubtilitatem, ita qui ſunt a Capitonis partibus, ſimplicitatem magni faciunt. Ecce IULIANVS *l. 13. XXVIII. ff. de lib. et poſſib.* palam ita pronunciat: *Licet SVBTLI IURIS REGVLAE conueniebat, ruptum fieri teſtamentum; attamen HUMANITATE SVGGERENTE ad aliam ſententiam decurſum eſt.*

Alius ex eadem aequitatis ſchola, IAVOLENVS ſcilicet, in quem omnis de Capitonis fonte humanitatis amor profluxerat, in *lege 28. XL. ff. de ſtatu lib.* aduerſus ius ſubtile, ab libertatis fauorem, ita diſputat: *Si hereditas eius, qui ſeruum, INTRA DIES TRIGINTA MORTIS SVAE SI RATIONES REDDIDISSET liberum eſſe iuſſerat, poſt dies triginta adita eſt, IVRE QUIDEM STRICTO ita manuſſus liber eſſe non poteſt, quoniam conditione deſicitur. Sed fauor libertatis eo rem perduxit, ut reſpondeatur: expletam conditionem, ſi per eum, cui data eſſet libertas, non ſtare, quo minus expleretur.*

Eiuſdem PRISCI aduerſus iuris ſubtilitatem, benigniorem ſententiam, vide *l. 25. XXXIX. ff. de donat.*

Proferam vnum adhuc, eiuſdem IAVOLENI non tam iuris, quam aequitatis conſulti, emiſſum, *l. 64. XVIII. ff. de cont. emt.* vtilitatis cauſa, aduerſus ſubtiles iuris regulas, decretum. Lex ita habet: *Fundus ille eſt mihi Titio entus. Quaero: vtrum in partem, an in totum venditio conſiſtat, an nihil actum ſit? Reſpondit: Perſonam Titii ſuperuacuo accipiendam, ideoque totius fundi emtionem ad me pertinere.* Hic ignari veteris doctrinae et proletarii iuris interpretes vix animaduertent, in quonam a iuris harmonia aberratum ſit, et in quo potiſſimum huius reſponſi aequitas verſetur. Oſtendamus ergo vtilitatem atque commoditatem illam, quae huic eſſaro cauſam

causam dedit. Primo satis cognitum est, neminem alteri stipulari posse. Haec vetus atque perpetua regula. Nec ergo alteri emere possum. Quærit in *l. 110. XLV. ff. de verb. obl.* Pomponius, si mihi et Titio, in cuius potestate non sum, stipuler decem, vtrum in partem, an in totum stipulatio valeat, an omnino nihil actum sit? et responder: non tota decem, sed sola quinque deberi, partemque alienam deduci. In emtione fundi longe aliter definit IAVOLENVS noster. Nam si mihi et Titio fundum emerim, omnem fundum ad me pertinere, et quod pro extraneo inutiliter contraxi, meam partem augere. Quæquam huius diversitatis ratio? Quæ, nisi commoditas? Illic enim cum decem essem stipulatus, quoniam quantitates ipso iure diuise sunt, *l. 29. in fin. XLVI. ff. de solut.* dimidia pars haud dubie debetur. Verum hic, cum fundum mihi et alteri emerim, totus ad me pertinebit, quoniam fundus tam commodæ, quam quantitas diuidi nequit. Nemo enim inuitus compellitur ad communionem ineundam. In fundo igitur, cum pars illa quæ debetur, sine incommodo ab altera, quæ non debetur, secerni non possit, IAVOLENVS commoditatis causa a veteri regula cessit. Ex his aliud pandectarum fragmentum, nempe illud MARCELLI *l. 26. §. 4. XII. ff. de condit. indeb.* lucem mutuabitur. Quærit videlicet: vtrum ego, qui centum debebam, errore quodam me ducenta debere existimans, fundum ducentorum si soluerim, conditione indebiti eum repetere possim. Et responder, me totum fundum recte petere, tanquam indebite solutum, Licet enim placuerit, rem pro pecunia solutam parere liberationem, tamen quia agellus, ita vt nummus, diuidi non potest, conditio integræ rei manet. Id enim vtilius atque commodius visum est.

Iam stamina huius materiae diducere longius meditati, innuenera enim sunt longæque plurima eiusdem rei exempla, ecce Atropos adest, fatale numen, quod hæc nobis fila inuitis rumpit. Possunt tamen, qui ista legerunt, similia in libris Iustiniiani facile reperire et nostris addere. Habemus et nos huiuscemodi exemplorum adhuc instructissimam penum et longe plura in aduersariis,

*Verum animo satis hæc vestigia parua sagaci
Sint, per quæ possis cognoscere caetera tute.*

LVCRET:

❧ ❧ ❧ ❧ ❧

MAG 2024264

LIBRERIA NAZ.
ROMA
ANTONIO EMANUELE